

Mid-Day Dogri News Bulletin, 07th April 2025

समे – 12:25

<><><><><><>

HM JK Visit

जम्मू कश्मीर दे दौरे पर आए दे केन्द्री गृहमंत्री अमित शाह होरें अज्ज कठुआ जिले दे बन्ने कन्नै लगदे इलाकें दिएं अगेत्रिएं चौकिएं दा दौरा ला करदे न। इस दौरे दा मकसद जम्मू प्रांतै च सुरक्षा हालात दा जायजा लैने दे कन्नो कन्नी बन्ने पर तैनात जवानें कन्नै मिलगंन, उंदे कम्मं लेई उंदी सराहना करियै उंदा हौंसला बधाना बी ऐ। एह्दे शा पैहले कल अमित शाह होरें जकीन दोआया ऐ जे जम्मू प्रांतै च आतंकवाद सरबंधी हालात पर तौले गै काबू पाई लैता जाग। उनें जम्मू कश्मीर गी परतियै राज्य दा दर्जा देने दे केन्द्र सरकार दे धेइयै गी पही पक्का करदे होई आखेआ जे बनकदा समा औने पर एह् दर्जा ब्हाल करी दित्ता जाग। कल चिरै संजा जम्मू पुज्जने दे बाद उनें बीजेपी पार्टी मुख्यालय त्रिकुटा नगर च पार्टी दे विधायकें कन्नै दऊं घैंटे तगर चली दी बैठक च बक्ख-बक्ख विषयें पर सोच बचार कीता। बैठका च प्रधानमंत्री हुंदे दफ्तरै च राज्यमंत्री डॉ. जितेन्द्र सिंह होर बी मजूद हे। अज्ज दिनें राजभवन जम्मू च जम्मू कश्मीर पुलसै दे शहीदें दे परोआर आलें कन्नै मिलगंन ते उनेंगी नियुक्ति पत्र सौंपगन। अज्ज संजा गृहमंत्री होर श्रीनगर लेई रवाना होई जांगन। कल उंदा श्रीनगर च दऊं महत्वपूर्ण बैठकें दी अध्यक्षता करने दा कार्यक्रम ऐ जिंदे च इक एकीकृत कमान दी, सुरक्षा स्थिति बारे बैठक ते दूई इस बरे दी श्री अमरनाथ जी दिएं तैआरिएं सरबंधी बैठक शामिल ऐ।

<><><><><><>

Budget Session

जम्मू कश्मीर विधान सभा दे बजट इजलास दा दूआ गेड़ अज्ज शुरू होआ। बडलै जिसलै सब्बै मिंबर सदन च किट्ठे होए तां नैशनल कांफ्रेंस ते एह्दे सहयोगी भयाले नजीर गुरेजी ते तनवीर सादिक हुंदी अगुवाई च प्रश्नकाल गी स्थागित करने ते वक्फ कनून बारे चर्चा कराने लेई इक स्थगन प्रस्ताह् रखेआ। बीजेपी नै सदन च अपने नेता सुनील शर्मा हुंदे नेतृत्व च एह्दा विरोध कीता ते एह्दे पर किश चिरै लेई सदन च डंड रौली मची दी रेही। एह्दे पर विधानसभा दे स्पीकर अब्दुल रहीम राथर होई स्थगन प्रस्ताह् गी एह् आखदे होई खारज करी दित्ता जे बिल कीजे अदालतै च ऐ इस करियै ओह् स्थगन दी मंजूरी नेई देई सकदे। इस मुद्दे पर डंड रौली दे चलदे सदन दी कारवाई किश चिरे लेई स्थगन बी करनी पेई।

जम्मू कश्मीर असैंबली दा बजट इजलास 12एं दिनें दे वक्फे परैत अज्ज परतियै शुरू होआ करदा ऐ ते अत्तरूं 9 अप्रैल गी इसी अनमित्थे समें लेई स्थगित करी दित्ता जाग। 7 ते 9 अप्रैल गी प्राइवेट मिंबरें दे प्रस्ताह सदन च रखे जांगन जिसलै जे प्राइवेट मिंबरें दे बिलें गी 8 अप्रैल गी सदन व रखेआ जाग।

<><><><><><>

Cabinet Sub Committee

आरक्षण नियमें बारे त्रै मिंबरी उप-कमेटी नै सेहत मंत्री सकीना इत्तू हुंदी अध्यक्षता च कल SKICC, श्रीनगर च केई शिष्टमंडलें ते विद्यार्थिएं कन्नै गल्लबात कीती। जंगलात मंत्री जावेद अहमद राणा ते ट्रांसपोर्ट मंत्री सतीश शर्मा होर बी इस मौके पर मजूद हे। गल्लबात दरान शिष्टमंडलें मजूदा आरक्षण नीतिएं पर चिंता जाहर कीती। उप-कमेटी नै शिष्टमंडलें गी भरसा दोआया जे सब्बने पैहलुएँ पर बचार कीता जाग ते कुसै बी फैसले पर पुज्जने लेई इक ईमानदार ते समावेशी दृष्टिकोण अपनाया जाग।

<><><><><><>

Rijju Andrabi

जम्मू कश्मीर वक्फ बोर्ड दियां अध्यक्ष डॉ. दरख्शां अंद्राबी होरें कल श्रीनगर च अल्पसंख्यक मामले दे केन्द्री मंत्री किरें रिजिजू हुंदे नै मलाटी कीती ते जम्मू कश्मीर च वक्फ सरबंधी विकास कार्यक्रमें ते वक्फ संशोधन बिल-2025 दे फायदे दे बारे च गल्लबात कीती। डॉ. अंद्राबी होरें जम्मू कश्मीर च वक्फ दी कमजोर प्रबंधन बवस्था च सुधार आहन्नने लेई बोर्ड दे जतनें बारे उनेंगी दस्सेआ। उनें वक्फ कनून च सुधारात्मक बदलाव आहन्नने लेई केन्द्र सरकार दी सराहना कीती। किरें रिजिजू होरें बी मुस्लिम समुदाय दे लोकें गी बिल दे फायदे बारे जागरूक बनाने च डॉ. अंद्राबी हुंदे जतनें दी सिफत कीती।

<><><><><><>

World Health Day

सेहत आस्तै जागरूकता फैलाने लेई अज्ज पूरी दुनिया च सेहत सरबंधी कुलसंसारी ध्याड़ा मनाया जाग। एह ध्याड़ा हर बरें मनाया जंदा ऐ ते हर बारी सेहत सरबंधी इक विशेष विषय पर संसार भरै दे लोकें दा ध्यान अपने पासै आकर्शित करदा ऐ। अज्ज दे ध्याड़े यानि 7

अप्रैल गी गै ब'रे 1948 च विश्व स्वास्थ्य संगठन यानि WHO दी बी स्थापना होई ही। इस ब'रे सेहत सरबन्धी कुलसंसारी ध्याड़े दा विषयसार ऐ "नरोई शुरूआत मेदे भरोचा भविक्ख"

<><><><><><>

PM-Day

प्रधानमंत्री नरेन्द्र मोदी होरें इक नरोए ते खुशहाल विश्व दे अपने धेइयै गी फही पक्का करदे होई विश्व सेहत दिवस दे मौके पर आखेआ ऐ जे सरकार लोकें दी सलामती ते तंदरुस्ती गी जकीनी बनाने लेई, सेहत दिक्खभाल दिए सुविधाएं ते बवस्थाएं पर ध्यान देना बरोबर जारी रखोग। उनें आखेआ जे नरोई सेहत इक खुशहाल समाज दे आधार ऐ।

<><><><><><>

Rana Forest

जंगलात मंत्री जावेद अहमद राणा होरें जंगली संसाधनें दे संरक्षण ते प्रबंधन लेई किट्टे रलियै कम्म करने दा रौंऽ अपनाने दा आह्वान कीता ऐ तां जे जंगली जीव-जैतुएं दे संरक्षण ते पर्यावरण माफिक सैलसफा दे विकास पर चेचा ध्यान दिता जाई सकै। एह गल्ल उनें श्रीनगर च जंगलात मैहकमे दी समीक्षा बैठक दौरान आक्खी। पर्यावरण ते जंगली संसाधनें दी राक्खी लेई जत्ने गी बदाने दी लोड़ गी दिक्खदे होई मंत्री होरें सभ्मनें मुतलका धड़ें गी एहदे लेई पूरी पराती ते असरदार रणनीति तैयार करने लेई आखेआ। राणा होरें इस गल्लै पर जोर देइयै आखेआ जे जंगलें दे संरक्षण च मुकामी समुदाय दी अहम भूमिका हुंदी ऐ कीजे एहदे कन्नै जंगलें दी कटाई गी घट्ट करने ते जिमी दे टिकाऊ इस्तेमाल गी बढ़ावा देने ज्नेह लाह हासल हुंदे न।

<><><><><><>